

放游錄

華輝題





欽定四庫全書



卷續古十五卷
臣等定案已於
豫章山查文查

序

仲岐廉訪以放歸之暇縱覽名勝渡洞庭湖溯江入
匡廬道吳越訪虎邱慧泉西湖天台雁宕皆絕幽歷
深窮奇躡窟爲記並係以詩嗣自南徂北游西山於
己亥夏六月至京相見出示放游諸詩及記命序之
公與家君患難交法越之役從事鎮南關前敵未嘗
且夕離事定家君旋粵東公手書訊問無少間故昌
有以悉公之生平序公之詩及事也公在龍州總治
營務兼籌後路軍事完器械峙糗糧軍儲不匱士氣
放遊錄

序

一

百倍遂有諒山之捷厥後中越議界公觀察太平歸
順與法使者會勘鎮南關邊境遇事持大體不爲苟
屈尤能執之以理因是悉返故地且令法使歸金龍
崗之地於粵西並推之廣東欽州黃竹山白龍尾等
處依界立石此數處者皆交廣之藩籬而白龍尾尤
欽廉之要害也始家君奉檄勘欽州界抗圖力索百
折不撓得公言而界石以立世或謂尺寸之區無裨
全局顧不聞韋載之論原州李魏公之爭維州乎公
性情懇摯故爲詩近杜間入太白香山或奇崛而不

詭於理亦近昌黎惟不爲西崑體讀公之詩公之品
之行可以知即公之心亦可見矣光緒己亥七月世
愚姪丹徒尹克昌拜序

放遊錄

序

二



此書以歐陽文忠公之少在石門其先表讀公之詩公之品
之行可以知即公之心亦可見矣光緒己亥七月世
愚姪丹徒尹克昌拜序



放遊錄

新建

蔡希邠

稼堂

金四



光緒己亥正月十八日余卸湖南臬篆將去長沙擬從潯陽作匡廬之游緣江而下取道姑蘇遍訪東南山水之勝俞伯鈞太史有詩送別余亦有留別詩於二月初六日挈眷登舟

長沙瀕行留別俞伯鈞太史並柬在城諸公

青蠅從何來營營止於樊

帝閭萬里遙所畏人多言宵小善排擠賢哲沈其寃

放遊錄

一

自古皆已然亦胡獨深論長沙遷謫地賈誼後屈原吞舟制螻蟻徒弔傷忠魂曰將去此邦浩然歸志存故鄉有匡廬山列五老尊乘輿詣登眺興盡趨吳門虎邱與慧泉堪載酒滿樽還當入越中湖上酣嬉春天台鴈宕奇足涉境始真會須陟華頂鷄鳴看朝曦更循石梁度俯聽飛泉喧茲願抱頗久束縛不得伸回思卅年內實苦塵事繁叨假閒歲月放遊亦天恩

仲岐廉訪解組去湘有日擬為匡廬之游且遍

訪東南山水諸勝謹成長句一首即以贈別

長沙俞鴻慶伯鈞

我聞匡廬之山天下奇屏風九疊撐天開金光浴
日出眞面瀉瀑飛雲無盡時又聞浙中山水東南
冠聖湖萬景足娛玩天台雁宕兩雄絕普陀靈境
烟雲漫蔡侯好入名山游似公福慧幾生修意氣
卓犖凌九州鴻雪到處名俱留曩時治軍運奇策
防邊早擁外臺節歸然官蹟建西嶠歛爾鋒車下
南國權輿百度才五旬陡從宦海驚抽身來何暮

放遊錄

二

兮去何速水波草色湘江春平生雅不尙浮競一
官拋卻夫何病包涵川嶽胸懷潤老去登臨腰脚
健卅年游興依然在世外閒身更瀟灑且過重湖
度九江便向西冷望南海在昔龍門探奇書發皇
文藻光石渠少陵足跡遍天下晚歲詩境世所無
江右自古多詩人豫章宗派有淵源我公賡續千
秋業精神著作年年新鯁生相見苦恨晚樽酒論
交辱青眼搔首東風欲別難驪駒一曲晴光煖客
行自保後凋松後緣且訂萍水蹤哀然大集紀名

勝寄我一開星斗胸

初七日解纜長行以小輪船拖過洞庭於初十日馳泊武昌城下稍作勾留黃鶴樓尙未修復晴川閣則早經登眺者有年矣十五日渡江乘肩輿穿漢陽府城過漢口路見亭臺簇起樓榭環開輿人告曰此近修伯牙臺也遂入游爲憩時許

伯牙臺小憩

鼓琴人已渺山水自高深且向臺前坐冷然絃外音當時荷樵客來此只荒岡今日滿亭榭往來冠蓋場

放遊錄

三

十六日由武昌解纜仍以小輪船拖送九江於十八日泊龍開河是夜風暴起浪洶湧舟各自相撞擊幾拔走幸五更風漸息十九日早出視匡廬諸峯皆白頭知夜雪旋霽訪羅統丞孝廉綱領於城中當以原船載眷附輪先返獨留約其同游廬阜而雨連綿不斷二十五日天稍開朗遂與統丞攜僕從行七十里晚投海會寺宿尙微雨二十六日晨起寺僧導瞻三寶諸法相遍歷梵宮精舍佛殿毘盧閣足稱廣大道場聞寺久廢爲至善和尙募化十方檀越捐建更擴

舊基惜至公已圓寂逾年不獲一參禪語也午後從
寺門望五老峯昂霄聳壑古翠蒼顏如五老人立空
際蓋前被雲遮蔽今始出焉隨過華嚴寺並黃雲寺
訪吳竹莊方伯所建觀音閣率敗壞不可登於未刻
止白鹿洞書院日已西當與統丞搜各碑碣並由獨
對亭溯枕流橋沿溪散步至釣臺仍折回院上御書
樓樓與好我亭對一覽山輒環拱水輒縈帶掩映乎
青松白石紺宇朱垣而五老峯橫列屏障信哉其爲
名賢過化之區也

放遊錄

四

九江訪羅統丞孝廉即約其游廬阜

料峭春寒曉入城匡廬雪滿出墻明擬探靈境忘羈
旅欲散幽懷仗友生閱世影如駒過隙自戊辰己巳年過此至今
三十年爲慰人聲是鳥呼晴不須咫尺愁風雨曳杖
從君攝屐行唐人有咫尺愁風雨匡廬不可登句

統丞有詩見贈次韻答和

落落多慚野鶴姿撫躬翻悔挂冠遲漫爲壁上書空
語昨作塵中解組詩把臂可能從海嶽掉頭真欲上
天池念菴心學傳家法宗派猶存許我窺

二十五日冒微雨入廬山投宿海會寺

五老雲中看不見。松陰夾道欲黃昏。禪關靜掩無人叩。細雨斜風客到門。

樓閣莊嚴啟廬山。第一層高人經卓錫。勝地合傳燈。香火三生證烟雲。萬壑騰我來。留止宿應是在家僧。白鹿洞恭步朱子詠示同游得謝字韻

老獲遂初衣。民物責新謝。薄游首匡廬。適及是時暇。緬懷紫陽翁。茲洞嘗稅駕。道岸期誕登。全賴津梁架。空山抱完璞。至寶本無價。纘聖開羣賢。尊王斥雜霸。

放遊錄

五

見知竝聞知。遞續承過化。世運有隆替。習靡風斯下。異學紛爭鳴。狂怪生駭詫。所冀正復崇。宏規整齋舍。毋徒博升斗。取足代躬稼。載瞻向前楹。清氣灑亭榭。華蓋松

紫陽手植桂。無在。惟有一松華蓋存。看得亭亭森獨立。矯然鱗鬣老龍孫。

二十七日於白鹿洞早飯。先出訪棲賢經慈航寺。就觀音橋支鑪煮第六泉。泉曰招隱。有亭覆之。其上七賢山橋跨兩崖中。挾湍水穿石罅。下金井。舞雪轟雷。

或云即三峽澗。橋底鏤金井二字盈數尺。余與統丞
憑欄啜茗。仰看疊障。俯瞰飛湍。直飄飄乎欲仙矣。次
由棲賢訪萬杉寺。殿宇悉經兵燹蕩然。然皆得望見
五老峯深秀奪目。並於棲賢寺觀瑪瑙鑪。銅塔及堅
固子。按堅固子非舍利。然摘頭髮吸便粘住。亦金剛
身經鍊凝結而成者。萬杉寺惟後巖磐石方徑丈。上
鐫龍虎鸞慶四擘窠字。大如石。最後過秀峯寺。即開
先其殿宇亦頽廢。而基甚宏。敝並存。昭明讀書臺址
有碑記及王文成紀功碑。皆可讀。乃新雨後徑窄而

放遊錄

六

滑且陡。不克躋黃崖寺。謁文殊塔。觀瀑布。但於寺西
麓望香鑪峯。及瀑布泉。殊未盡致。既從西麓攀蘿循
石磴。轉入青玉峽。踞磐石觀瀑布。穿巖越壑。下會馬
尾泉。注龍潭。仍怒飛出峽。崩雷抉石聲。震崖谷爲傾
耳者久焉。未幾夕陽下山矣。遂宿秀峯僧出。

仁廟金書多心經。册敬觀尙完好。而夜寒甚。二十八
日早猶雨霰隨止。訪歸宗寺。寺爲王羲之故宅。規模
壯澗。後擁三祖巖。鐘樓佛閣。經藏齋舍。具在。並建
行宮。惟大雄寶殿一片荒土。寺僧導觀墨池。並諸碑

刻問簾泉榛莽蕪壅游人不能舉步遂行出柴桑望
淵明醉石夜投呂氏書館

觀音橋與統丞瞰湍水並支鑪烹第六泉

崖懸壁立走鶯湍中有危橋跨尙寬激石奔雷穿作
峽飛花滾雪舞迴瀾七賢山色重重護百折溪流曲
曲盤爲賁名泉親品第呼童瀹茗坐憑欄

棲賢寺

清晨從講院數里入棲賢水信龍湫出山疑鹿洞連
石鑪紅似火銅塔碧於烟猶有毫光現金精粒粒圓

放遊錄

七

萬杉寺

萬杉無復七星木只遺磐石後山麓上鑄徑丈字擘
窠龍虎鸞慶意安屬佛殿摧殘劫火經兎葵燕麥空
青青老僧細話亂前事翠擁雲幢陰滿庭

秀峯寺

梵王有宮殿秀峯實開先終竟門不二故應界大千
溯從黃巾起紺宇成荒烟試尋讀書臺臺廢碑尙全
並尋陽明碑碑字深雕鐫文章與功德一脈垂綿延
煌煌般若經

宸翰親染箋

仁廟昔頒賜馳詔匡廬宣寶之二百載墨爛泥金妍
琅函世尊奉護法承諸天

始從秀峯寺觀瀑僅得其半旋往寺西麓觀之仍
未盡致遂下詣龍潭側踞石坐看瀑布會馬尾
泉下龍潭出青玉峽

兩峯中斷劃翠壁放下飛泉一千尺我初來向蕭寺
窺惟見蜿蜒露蒼隙轉嫌有懷不得騁似此眼界真
太窄迺過西麓一縱覽倒挂銀河瀉天闕噴花翻雪

放遊錄

八

差可擬濺玉跳珠碎無迹乍驚日照成虹霓旋訝晴
空轟霹靂祇惜黃崖望莫登雨餘徑滑况崕岬遂攀
蘿作偃僕行逶迤徐盡半山脊忽如繩井入深峽但
聞金鐵縱錚相戛擊知是瀑布會合馬尾流全下龍
潭注龍宅石故遏之怒龍激龍不怒水水怒石水聲
震谷龍耳塞萬丈寒光搖練白

歸宗寺

歸宗原古寺捨宅自羲之未失藏經閣仍留洗墨池
翠巖三祖擁黃幄六龍垂即謂行宮欲覓簾泉賞荒蕪草

不治

二十九日早起擬登天池因山徑過崎嶇詰屈改由通遠驛赴東西林西林寺與東林望衡對宇東林寺基廣倍西林第除頽垣敗壁中有小屋三楹外概犁爲田尋虎溪橋僅遺甃石三笑亭址俱沒兩蓮池亦淪陷田中矣九泉僅見其三餘皆湮塞但徐覓得陽明詩碣及柳公權李邕殘碑各一段東林無下榻處仍過西林寺宿而遠公塔在西林寺側塔有廬覆終歲局閉左右各修洞如井式然不甚深探亦不得其

放遊錄

九

門相傳宋時啟視燈尙未滅後添油注缸滿閉焉

東林寺訪虎溪橋蓮社三笑亭諸勝蹟謁遠公塔

夜宿西林

客投西寺先東寺廬阜東西兩寺鄰橋失虎溪惟石在地追蓮社並池湮九泉水已源多竭三笑亭何址可循獨有遠公遺塔峙智燈留照又千春

三月初一日從西林寺過牯牛嶺見洋人所造樓房百餘座爲避暑計然地磽确石亦頑劣不知彼族何取豈別有會心耶爰向牯牛嶺下緣鳥道千廻百折

入黃龍寺兵燹後僅存後殿滿目荒涼惟山門外竇樹雙株矗立高過百尺大各十圍聞洋人出重價購之而僧未允差強人意是夜回牯牛嶺假館卡房初二日曉乘肩輿從牯牛嶺山麓北行五里許望天池山不得上遂舍輿徒步繞佛手巖陟山頂謁御碑亭碑石瑩潔如玉字深刻無一漫漶碑陰刻仙詩二首文爲明太祖撰載天眼尊者赤脚仙周顛事甚詳惟天池寺久廢塔亦僅存傾圮池涸隨下山仍由牯牛嶺山麓西轉與統丞各乘肩輿返郡城又雨是行計勝歎哉

放遊錄

十

往還七日並周歷匡廬南北及四大叢林其游不可謂不豪矣但諸寺經兵燹迄未修復而春日並多陰雨若三石梁九屏風卒未能親涉其域而攬其勝可初二日與統丞早登天池謁御碑亭一亭危聳白雲邊風雨侵陵幾百年碑自不磨瑩似玉紀真天子遇周顛路從佛手巖斜繞人向天池頂上行長嘯振衣千仞立舉頭先見九江城

初三日上巳節返九江承家燕生太史金臺羅統丞
昆仲招同熊小峯先生修禊於甘棠湖之烟水亭亭
峙湖心望匡廬如在几案蓋其眞面正與九江城對
而背南康也越二日附江輪東下過安慶蕪湖皆舊
游處不得泊至初八日午抵鎮江因買邵北船過姑
蘇是日并游金山寺寺全在岸適應走馬上金山之
謠惟佛殿穹窿規模閎峻誠不愧爲莊嚴樓閣惜當
日在江中時未一登眺之

金山寺

放遊錄

十一

浪傳陵谷變塵寰事在將疑將信間不謂及身經眼
見果然走馬上金山

曾記當年鼓棹過遠看浮玉迥嵯峩一拳獨踞江心
立絕似晶盤擁翠螺

即今樓閣尙莊嚴俯瞰晴波鏡啟匳從此蓬萊離弱
水四時鐘梵近閭閻

初十日鎮江府城開舟舟中明窗淨几依路看山把
酒讀書頗樂十二日將進無錫縣河遙見樓臺一簇
四面漣漪知爲小金山之勝遂入游憩片時當即登

舟循小河堤行里許訪慧泉泉左山麓爲大寺今廢
改建昭忠祠然極宏麗並多亭榭結構玲瓏奇石珍
木相與掩映特徘徊觀望者久之尋下山擇茶肆之
依慧泉井者就汲泉煮爲瀹茗品焉隨僱肩輿登惠
泉山頂望太湖於十三日過常州府城十四日晚抵
姑蘇城內經兵燹後衢巷尙多未修復者十五日晤
黃小霽司馬琪趙嘯湖明府鴻即爲小霽招與嘯湖
乘畫船游虎邱兼登滄浪亭謁五人墓虎邱僅存客
廳三楹並廻廊一曲而已十六日嘯湖又備畫船招
發解纜赴杭

放遊錄

十一

與小霽載酒游燕在留園作半日清談其園之勝過
滬張園即愚園亦不如遠甚是日上燈時始回舟明
小金山

焦山我曾游可無買舟楫且游小金山爲補金山缺
若大金山遷岸傍小金山在水中中央瓊樓玉宇波環
鏡露榭星臺月轉廊

慧泉

中冷天下泉無匹陸鴻漸評居第一我今來訪第二

泉烹取雲腴水新汲廬山亦有泉智慧惜哉東林久

湮塞

東林寺智慧泉僅存斷碑

虎邱

尚見獅山峙

山在虎邱對面

空聞虎阜傳樓臺惟賸此川陸

故悠然花落真娘墓茶嘗愁井泉可憐歌舞地蔓草

遍荒烟

五人墓

顏佩

念周文馬傑

沈陽

易代姓名馨數偶符天地

光宜炳日星花枝供老圃

墓基為守者種花

蘋藻薦寒汀門

放遊錄

內豐碑立長年總不局

滄浪亭

滄浪亭下水漣漪幽徑斜通長史祠搖曳春風無限

恨多情惟有柳絲絲

十七日解纜閩門於十九日晚抵嘉興府城宿二十

日早行出河口始知烟雨樓在城外未及登臨惟沿

途河小而深橋最多且密並高且大橋下可通舟楫

二十一日到杭州尚未晚泊官碼頭當起行李存寄

保安橋唐寓即由湧金門外買舟度湖寓彭少保祠

之一奇樓祠即其退省庵建有橋平澗曲達三潭卽月樓據全湖之勝二十二日爲夏蔭孫太守敬中家哲民參軍煥熙招集湖舫先泛漪園園三面環湖水後擁石巖巖石奇秀自成洞壑頗得林巒幽奧之致旋自漪園登岸過淨慈寺寺背南屏山爲南屏晚鐘西湖十景之一慧日閣固經兵燹無考卽大雄寶殿羅漢堂圓照樓俱燬獨山門近修落成東西院僧寮尙在入坐時許覺南屏蒼翠落几案間尋出觀神運井相傳爲濟顛師運木井中仍上湖舫望湖心亭西

放遊錄

十四

度水波不興雲影天光一碧萬頃同人皆謂身置畫圖矣是日以設席高氏山莊止焉山莊面湖竹樹蓊蔚有池如帶迴廊抱之廊盡處爲船廳廳盡處又爲廊廊接脩磴縈紆從假山洞陟山亭亭負石翼然其北則薔薇木香兩花盛開牽霞曳雪清芬襲人南則藤蘿繚垣夾徑轉入綠陰深處有堂臨水卽讌其中旨酒泉淳繁殺綺錯相與悲歌慷慨痛飲淋漓日斜而散二十三日羅星丞明府綱銓爲統丞兄邀與葉祖香太守元芳劉雲樵明府喬祺同泛畫船游讌遂

緣蘇堤迤邐行泊孤山放鶴亭側謁林和靖先生祠
墓及林典史之墓嗣移船謁岳忠武王祠兼謁其墓
並訪忠泉墓前鐵鑄四囚樹枝無一北嚮爲徘徊瞻
仰時許返船且游且譙盡一日歡真所謂良辰美景
賞心樂事二十四日獨攜壺榼泛舟湖上並謁左文
襄及蔣張二公祠隨過文瀾閣縱覽湖山全收在目
二十五日葉祖香太守先僦舫約夏蔭孫暨劉雲樵
羅星丞家哲民等同泛湖至茅家坪換肩輿之靈隱
接靈隱即武林山又曰靈苑曰仙居寺初廢爲吳越

放遊錄

壹

錢氏開寶二年重建並建經幢寺門左右歷宋元明
興廢靡常今寺則建於順治時康熙二十八年

賜額雲林寺迨經兵燹覺皇殿妙應閣悉成焦土而
羅漢堂五十四楹猶巋然如魯靈光殿也以外飛來
峯諸巖洞並冷泉亭皆在自山門一路古木扶疏濃
陰匝地走訪飛來峯玉乳洞壁巉絕鑄佛像幾滿出
洞登冷泉亭隨入雲林寺稍憩過羅漢堂參謁五百
羅漢畢飯齋舍擬游韜光寺因日已晚遂乘輿馳上
中下天竺仍望茅家坪返棹二十六日雨游湖舟子

皆叢笠兀坐倚窗看烟雨並湖上諸山蒼翠欲滴誦
山色空濛雨亦奇之句及雨絲風片烟波畫船良可
心領神會二十七日早餐一寄樓乘畫舫補游平湖
秋月等處並過錢武肅祠讀蘇長公表忠觀碑隨訪
柳浪聞鶯亭已傾圯即當年垂柳無一株矣遂從湧
金門入城小住二十八日憚菘耘方伯招飲署中清
談竟日二十九日偕蔭孫星丞哲民等散步街衢並
游城隍山即吳山同躋絕頂俯瞰左江右湖殊有顧
盼自雄之概

放遊錄

六

四月初一日劉雲樵明府招同萬砥莊觀察並葉祖
香夏蔭孫等讌集吳山新修落成之江南館初二日
萬砥莊觀察復邀雲樵祖香蔭孫星丞哲民諸子同
集湖舫游讌小泊孤山初三日爲星丞哲民招與蔭
孫太守共乘肩輿由鳳凰山經于忠肅公墓道入雲
棲寺寺無崇門大殿惟建法堂以奉經律禪室以處
僧徒

仁廟題有雲棲寺松雲閣二額並

純廟題額有香門淨土悅性亭西方極樂世界距寺

里許夾路皆竹游人行竹中心目俱爽綠陰侵衣袂
間隨晤知客僧導觀華藏世界海並謁蓮池大師之
塔留飯客堂時日漸西因出取道大慈山訪虎跑泉
泉在大慈山定慧寺西院舊傳有僧卓錫茲山苦之
水忽夢神告當遣二虎移南嶽童子泉來師無憂也
翌日遂見二虎跑地作穴泉湧出嗣詢游脚僧自南
嶽來者謂童子泉涸矣在寺取泉瀹茗品之甘冽異
凡泉初四日游昭慶寺初六日料理行裝將往天台
雁宕

放遊錄

七

杭州寓西湖一寄樓

寒碧縈沙竹全湖納此樓開窗雲冉冉捲幔水悠悠

渚近容招鶴潭空許狎鷗

三潭印月
東即鶴渚

一枝容暫寄且

作小勾留

不知春已晚荷細葉初生波影堤邊漾山光檻外橫
長江圖在壁高閣酒盈觥泉下如呼起吾當醉老彭

承夏蔭孫太守家哲民參軍招集湖舫先泛漪園

過淨慈寺小憩出讌高莊

鶯花三月忙西泠蘭橈競買從湖亭翩然邀我有二

妙鳧鷗拍拍隨揚舲言指漪園共洞溯載過古寺瞻
南屏竹房松院自瀟灑見石奇崛還瓏玲禪堂列坐
尋復去一棹逕往山莊停迴廊曲折抱池轉旁擁竹
樹干青青薔薇正舒霞爛漫木香霏雪同流馨遂探
幽入薜蘿徑更取樂集芍藥廳金樽綠醅浮歛澁春
色酣醉濃難醒沈沈酒闌客漸散近搖歸槳垂楊岸
晚烟殘照下雷峯待看月印三潭畔

聖湖縱目

樓臺高下倚芙蓉倒映漣漪積翠重裏湖水通外湖
放遊錄

六

水南高峯望北高峯橋邊畫舫時時過陌上香車處
處逢我亦騷人並羈客徜徉聊與豁幽悰

羅星丞明府招同葉祖香太守劉雲樵明府畫船
游讌小泊孤山旋謁岳王祠墓用杜陪姚通泉

宴王侍御東山韻

羅家兄弟真罕儔性耽一壑並一邱匡廬之麓西湖
曲屢煩伯仲陪同游綺筵矧更饒膳饜十千沽酒爲
寫憂良辰風日趁和美跌宕先放孤山舟波平如鏡
凝不流葦間延緣姑少休逋仙當日此高隱託林鶴

外他何求亭前時見浮嵐湧剛值雨添新翠重岳王
祠墓鬱差峩拏船造謁精誠動黃龍痛飲與心違二
帝蒙塵竟不歸終古寃埋莫須有至今淚下紛沾衣
早起湖上
空明萬頃碧玻璃正是朝陽未出時如此乾坤真靜
氣西湖上有幾人知

雨中泛舟

一湖烟雨綠濛濛無限樓臺烟雨中乘弄小舟泛烟
雨笑着山翠溼侵篷

放遊錄

九

葛嶺

風流歇絕半閒堂賸水殘山滿夕陽聞道秋水多蟋
蟀曾同軍國細平章

葉祖香太守招泛舟至茅家坪登岸遂乘肩輿赴

靈隱遍探巖洞諸勝即飯雲林寺並游天竺

好山多臨湖連日看未足主人真解人招我靈隱麓
始乘木蘭舟相與沿溪曲輒棹從茅坪催換籃輿促
嵐光染衣袂蒼翠紛亂撲岩堯俯山門森森蔭喬木
奇峯迓飛來翩如朶雲簇其下藏洞幽豁訝乳垂玉

捫蘿試呼猿清響答巖谷有亭冷泉上涼沁人心目
翼然對招提禪院龍宮伏武林亦仙居羣嶠茲結束
顧自開寶還不見經幢矗並先覺皇殿一片荒草綠
尚幸羅漢堂無勞更修築規制依舊宏五百應真屬
謁罷日正中齋供香馥郁隨緣饌伊蒲蔬筍容果腹
旋出賈餘勇窮眺恣遐矚輕輿疾若馳上中下天竺
夕陽鴉背翻落霞送歸鶩回首望雲林山斷烟與續
雲棲寺

山門既深邃夾路脩竹脩亭亭萬竿植濃綠蔭道周
放遊錄

三

使我心亦涼入望彌清幽雲棲有古剎遙占西湖陬
禪房並齋舍佛寺連經樓參差倚天闕勢欲凌斗牛
婆娑若張蓋樹多逾千秋何當就聽平法頑石同點
頭仙師不可作遺塔存荒邱君看五雲塢紫氣應長
留

虎跑泉用東坡韻

橋通石徑穿雲上山寺彌高客彌仰於菟爪舞並張
牙童子脉移如運掌忽教湧地球瑣生端應在天鐘
梵響炯然如見智慧心塵根斷絕非非想

初七日與羅星丞明府渡錢塘江行五六里買舟赴
紹興府夜泊柯山村初八日早起柯山先訪普照寺
寺有大雄殿嵌石洞洞高薄霄漢就石鑿大佛約丈
六尺外有奇石突起不計尋丈根瘦極中漸大而頂
復小一圓石如香鑪名曰香鑪石好事者爲刻雲骨
二字右七星巖巖巉絕壁立下皆有泉窈然以深初
從巖竇循磴拾級入山門謁毘盧閣閣後廊面巖一
潭寬僅半畝深莫測石欄繚之因招茅孝廉喬梓小
飲茅孝廉柯山村人爲星丞明府之同年生過西又

放遊錄

三

一巖巖下潭約二三畝潭之上有石磴出潭水處有
澗澗有小橋橋以南爲正廳廳又西則船廳也是日
回舟時已亭午晚抵紹興府城爲劉雲章明府鼎亨
延寓其宅初九日雲章明府備舟泛鑑湖一曲隨即
登岸改乘輿向山陰道往蘭亭熊岱青太守起礮亦
與偕並於返棹時留讌舟中是日微雨至蘭亭徘徊
瞻仰所謂崇山峻嶺茂林脩竹清流激湍映帶左右
者洵足娛目騁懷惟曲水流觴處累石池中迨分幾
道強之曲折流轉未免附會太鑿但

御碑尙隆然完好如新猶得敬讀令人神往我

朝全盛之時初十日山陰會稽兩大令招與羅星丞
劉雲章明府同探禹穴遂謁禹陵其地佳氣鬱蔥龍
蟠虎踞是爲肇造有夏四百祀之基而寢廟後窆石
亭特紀垂久遠可無疑焉游畢讌集東湖並先約熊
岱青太守東湖乃近時修築北皆懸崖絕壁南亘長
堤水榭風軒涼臺燠館烟波狎客魚鳥親人然竟欲
以敵西湖難矣十一日水師管帶張少尹楚南詩人
邀訪青藤書屋自明易主不知凡幾櫻桃館柿葉軒

放遊錄

三

皆久無之惟天池尙存池深五尺廣纔三尺長六尺
老藤一枝蜿蜒池上然著葉不多壁鑄漱藤阿三字
並內外兩聯內聯未必元關別名教須知書戶孕江
山外聯一池金玉如如化滿地青黃色色空南院牆
鑄自在巖額皆真蹟是日登舟張少尹劉明府各乘
船送曹娥江過壩十二日謁曹娥廟見題黃絹幼婦
外孫壘白碑卻非原刻尋換舟經東山寺僱肩輿陟
山麓有洗屐泉沿路蒼松夾徑到寺門脩竹幾千萬
竿篩金夏玉弄月吟風綠陰滿地寺右爲太傅公祠

墓瞻眺歛歔旋下山復登舟行至新昌縣謀遵陸訪
天台之勝

浴佛日偕羅星丞由普照寺過七星巖招茅孝廉
喬梓同飲

崖空拔地起壁絕如鐵削不知太古時何年始開鑿
東與普照鄰幽寺因洞廓佛齊殿崇高丈六金身託
惜乏五香水竟體爲洗濯有石雲骨撐危聳根一握
相對望衡宇緣徑行犖塢逶迤入山門中峙毘盧閣
其後臨深潭沈碧淨無濁突兀面懸巖照影涵岬岬

放遊錄

三

展席共舉觴蒼翠杯中落更西千仞淵應伏毒龍惡
盤渦繞廻磴詰屈通畧約過此即前廳神悟舟藏壑
况曾在桂林棲霞屐嘗著桂林棲霞寺後亦有巖曰七星

紹興府城訪徐青藤書屋

荒城老屋此經過門巷蕭條易主多虛憶幽巖長自
在偶尋遺迹半銷磨櫻桃館可留沈醉柿葉軒當放
浩歌賸有青黃空色色天池一勺漱藤阿

熊岱青太守劉雲章明府同泛鑑湖旋自山陰道

游懋蘭亭因讌太守歸舫

淡雲何漠漠微雨何濛濛賓從屏冠蓋盪舟擁烏篷
紹興船名紆徐鑑湖度宛轉溪亦窮爰改乘肩輿取道山
陰中娛目忘遠近應接迷西東層巖秀競吐列岫增
蔥蘢引領亭在望高步追芳蹤憑欄縱清眺山嶺峻
復崇茂林間脩竹幽壑多飛淙左右相映帶翦然烟
翠叢觴詠泥陳迹曲水人疏通

宸藻敬瞻仰碑石猶穹窿嗟我生已晚盛典難重逢
矧今海氛惡逼處時非雍時比意利國以兵船逼索三門灣回船且

同醉一澆塊磊胸

放遊錄

禹陵

松杉鬱翠草長青佳氣潛凝窆石亭鳳翥鸞翔真毓
秀龍蟠虎踞自鍾靈冕旒萬國昭儀度圭璧千秋重
典型敷土芬流明德遠高山仰止有餘馨

曹娥廟

孝行絕特昭人寰一女子死重泰山年十四人乃如
此抱父屍出波濤間巍峩廟向江濱峙碧瓦朱甍映
江水嗚呼江亦以之名至德同流千萬祀

東山寺謁謝太傅祠墓

道傍有泉洗屐篔簹萬个環門蕭寺崇祠依託石麟
卧塚猶存

斯人身繫天下不出如蒼生何爲問東山綵竹可留
餘韻烟蘿

十三日由新昌縣城外路出南明山經寶相寺有大
佛高十丈就巖石鑿成其殿五層全倚巖石結構左
右兩崖如獅子環抱據稱左雌右雄即於寶相寺午
齋行至斑竹店宿十四日早飯斑竹進天台先過太
平寺寺在山中天氣較寒階下芍藥花纔開嫣紅可

放遊錄

五

愛次過清涼寺所有山門大雄殿及兩廂房俱被回
祿今畧修復然局勢大佳左右山競擁護而竹最多
樹亦蒼秀又過地藏菴門額天台九華菴供地藏王
像於殿左地下點長明燈隨出過萬年寺是爲廣大
道場山門並大雄殿皆極宏敞經閣鐘樓俱峻門外
萬山環拱並多古樹高盡百尺大盡十圍土人稱曰
胖松其實杉柏始悟廬山黃龍寺寶樹雙株相傳爲
西藏來種者即此樹也晚宿僧舍告以羅漢田距寺
里許時久蕪廢十五日從萬年寺逕訪中方廣寺擬

觀石梁飛瀑到寺時午蓋飛瀑實合兩溪水併出一
溪噴雪奔雷轟崖震谷石梁卻生成從此山脚伸過
彼岸厚五六尺中裂爲二長不三丈窄僅數寸跨之
逾石梁有龕支絕壁供阿羅漢游人多不敢度究無
甚險立觀良久適傍溪新修樓枕飛瀑有窗對開因
坐樓縱觀時許過上方廣寺寬倍中方廣有經藏又
有羅漢堂供五百羅漢金身雖較靈隱寺小然亦莊
嚴法相下方廣無足觀者往華頂寺寺爲光緒二十
一年燬於火經募重建規模視萬年寺尤壯濶蓋華

放遊錄

三

頂高極瓦難耐凍且遇風輒吹去故蓋茅草茅易枯
爛見火便燎主僧他出募化遂告知客僧不如改用
三和土可一勞永逸並免回祿之災旋上拜經臺華
頂在天台至高經臺又爲華頂至高之處計程五里
步步攀躋天氣晴明堪望見海並雞鳴時看日出水
搖晃霞光萬道拜經臺並塔久圯尙遺數室距臺址
三五丈許兩泉深不盈尺四時無溢無涸品之其味
清甘先本擬於此宿起觀日出以雲彌漫山谷仍返
華頂一路茅菴不絕鐘梵之音相聞並娑羅花點綴

明豔第羲之石室太白讀書堂皆附會十六日晨起
過真覺寺謁智者大師塔塔爲智者法身所藏地名
塔院亦稱佛隴嶺抱溪環修竹夾石磴縈紆里許繞
進山門當在真覺寺小憩過高明寺寺亦遭火而大
殿尙存並空閣上懸巨鐘銅色古綠四望崇山峻
嶺一水交流僧出示智者大師紫金鉢繡龍袈裟貝
葉經經悉番字嗣過國清寺天台山至此豁然開朗
一塔危聳當門其大雄殿高六七丈廣將二十餘丈
並有三賢堂及羅漢堂供五百羅漢如上方廣惜寒

放遊錄

三

巖明巖無人導引國清寺距天台縣城五里夜宿城
外是行獨游無侶所晤皆俗僧問劉晨阮肇遇仙子
處都不能答但聞有桃源亦人附會並莫辨其徑徑
即赤城桐柏觀俱未克訪終日惟在雲中出入而已
天台山過太平清涼寺地藏菴夜投萬年寺宿

昔聞天台山今入天台境奧區必躬探佳處輒心領
碧溪丹嶂互合沓出奇景琴筑鏘泉鳴衣裳襲雲影
陟訝如升梯降詫如墜井險巖所勿辭塵慮紛已屏
寶地頻經過珠林各幽靜巋然古刹存門額萬年永

規模固壯濶軒豁更高迴杉柏森十圍繁枝拂烟冷
言就息吾足禪榻倦支枕祇是無盡燈終夜常烟烟
卧聞百八鐘猿鶴應共警

訪劉晨阮肇遇仙子處不得口占

采藥相傳劉與阮得逢仙子飯胡麻桃花流水渺何
處萬壑千巖雲半遮

中方廣寺建樓適成因坐縱觀石梁飛瀑

玉泉橫

去

飛作龍吼兩溪併出一溪口一溪欲截勿

使走故俾石梁跨崖陡石梁上積古苔厚下空百尺

放遊錄

天

底烏有水倒激梁梁不受折散成花雪紛糾瀆沫濺
面過人首懦夫目炫視難久健者亦殊未敢狃適僧
樓成對安牖我憑几坐容閣肘儘教顧盼隨左右飽
看慊心得非偶一洗胸中淨無垢曷止俗塵撲五斗
况聞聲徹耳根後直如夜半鐘亂叩鐘塔噌吰莫分
剖潭有靈物其聽否

入雲

輿中望前山山頂藏白雲行行至山頂人與雲不分
此身入雲中但覺雲氤氳

出雲

穿雲越山頂更有山在望望山更躋攀人在白雲上
回首看前雲隨風脚底颺

華頂

天台至高處華頂人皆稱豈知拜經臺猶自華頂升
沿途梵唄聞時晤茅菴僧岩翠五里程步步須攀登
與夫喘奔蹙方達最上層臺與塔俱廢惟有泉雙澄
掬之僅盈勺往往龍氣蒸見說朝日出初大如車輪
盪摩海水變萬道霞光騰區區鄙願始準擬雞鳴升

放遊錄

五

無如雲四塞咫尺辨未能仍馳返華頂舉首空峻嶒
娑羅花

一入娑婆界娑羅樹樹花淡香蒸絳雪濃豔渥丹霞
七葉全舒萼千枝正吐葩應同羅漢果果產天台共證梵

王家

謁真覺寺塔遂過高明寺索觀智者大師袈裟紫

金鉢貝葉經

偶來佛隴尋真覺靈塔中藏定慧身花放水流無障

礙寺門琪樹四時春

琪樹亦天台產

一從智者謝烟霞法器長留證釋迦高閣空明經貝
葉紫金盃鉢繡袈裟

國清寺

浮圖百尺倚雲端紺宇宏開佛域寬雙澗水縈橋鎖
碧五峯霞擁閣流丹祇園密布黃金地兜率高淩白
石欄更有三賢堂仰止寒山拾得與豐干
十七日早乘小艇下台州府一帶溪山如畫是日晚
巖府城當附渡船夜駛黃巖縣十八日雨十九日冒
微雨至大荆驛即於大荆驛宿二十日由大荆驛入

放遊錄

三

雁宕山行五六里見迎面一峯純石屹立如老僧披
袈裟揖客右轉如面壁再登謝公嶺望又如跌坐踞
石旁一僧附並附小僧移步換形即土人所謂老僧
巖者嗣過東石梁洞洞高千尺一石斜架洞門如梁
中有佛殿僧寮隨至靈峯見峯拔起平地兩巨石夾
峙相倚如仙掌既從仙掌尋罅入觀音洞緣磴拾三
百八十級歷臺榭凡數重進後殿殿因洞建供阿羅
漢五百而小並飛來觀音其上有泉滴池中題曰洗
心泉旋出洞洞圻一線天時灑泉點絡繹如撒珠不

斷洞外奇峯簇擁如劍如槊如笏如筆如筍如芝如禽飛如獸伏如人立坐詭異萬狀遂投淨名寺寺在深谷中其後軒面蓼花嶂爲大雄殿背在寺稍憩過鐵城嶂並游龍嶂兩崖束立萬仞摩霄游人若行巷中仰視青天如曲池中水止而不波所謂碧玉天也次訪水簾谷有巖如覆簷泉自簷端落如雨下湘簾一桁谷西轉見危崖聳出有泉纍纍如貫珠縱平約百丈橫約一丈正如珠箔成幅高懸隨訪維摩洞望仙橋過靈巖寺見石倚崖如叟側耳有所聽然爲聽

放遊錄

三

詩叟至靈巖寺負屏霞嶂門外四山環抱有峯一奇瘦獨立如鐵黝黑曰天柱一媚秀如美人靚妝曰玉女一翹翔如鳥對舞曰雙鸞其一如衲袒肩低眉僕僕爾拜者曰僧拜石亦名僧禮塔又若展旗卓筆參錯離立於蒼崖翠壁之間皆可娛我心目矣已而西出峽踞磐石觀小龍湫噴雪奔流頗似匡廬瀑布並披榛翦棘徒步蹙躓循磴凡七八百級躋絕壁石皆赭色獨一石青豎成龍脊從頂攢入洞中伸爪接地護龍鼻水近惟爪在龍鼻被人取去而水滴亦絕靈

巖寺無下榻處回淨名宿二十一日雨仍宿淨名寺
老僧巖

一峯如老僧袈裟披揖客客隨繞巖行老僧成面壁
再登謝公嶺又如僧坐石旁附有僧坐雛僧更附側
逐步移換形變幻真不測

東石梁洞

洞兮呀然如半月危梁偃臥架天闕苔蘚斑剝藤蘿
垂怒蚪奮髯龍蛻骨

靈峯

放遊錄



三

未須凌絕頂便已眾山小何來此奇峯穹窿插雲表
巨崖仙掌合雙闕深窈窕中坳一線天渾如夜初曉
邃竇飄珠璣因風吹裊裊是誰傾萬斛拋撒年多少
得毋列真居地靈不愛寶轉尋罅窮入詰屈蟠鳥道
豁然廣場開生成洞非造相傳大士身飛自南海島
並供阿羅漢五百足稽考各就巖穴嵌位置亦良好
上有洗心泉下鬣石爲沼無盈更無涸清澈色長皎
引瓢試酌之大暖除煩惱

淨名寺出觀水簾谷並珠箔泉遂探維摩洞望仙

人橋

蓼花嶂接鐵城嶂淨名寺正居其間我從靈峯過蕭
寺但聽流水鳴潺潺尋源谷入深如鑿巧織湘簾雨
疏落回首差幾百丈巔瓊樓一角垂珠箔壁斷溪連
盡古松維摩洞口白雲封仰看天半仙橋架矗起層
垣石甕通

聽詩叟

默默無言萬籟沈聽詩有叟是知音巖端袖著推敲
手寄語游人莫浪吟

放遊錄

三

靈巖

巖幽逞奇詭初涉目幾眩靈奧探靡盡愈深入愈變
神秀造化鍾瑰異洩爭獻一峯迄天柱獨立凜方面
一峯玉女妍明媚雲鬢顛一峯矯雙鸞交舞搏鬪健
一峯兀頭佗終禮塔無倦展旗霞擁屏卓筆天垂硯
名山百二冠氣象萬千瞻近惜龍鼻水滴絕珠璣濺
但露春瘦攢鱗爪時隱見尋復穿洞壑俯瞰飛匹練
踞石坐移時孤懷滌冰霰

二十二日淨名寺早發經列仙嶂並磴道曲盤躋馬

鞍嶺嶺界東西谷脊隆起全石如馬鞍式下上皆陡峻遂躡跚爲窘步至山脚再乘輿造能仁寺寺東臨鑊影潭西有鐵鑊可飯千人楞然置榛莽間前縈筋竹澗面火焰峯峯多黑石叢起成焰鑊影潭殆制之旋過羅漢寺看飛來羅漢望芙蓉峯翠奇秀度華嚴嶺沿錦溪凡十九曲有峯傑起高刺霄漢垂杪劈分兩股望如剪刀令人心悸欲仆者曰剪刀峯峯廻環轉次如錦屏如天柱末如一帆御風而拽入連雲嶂則危崖咋嶕暗谷幽深林木糾紛虧蔽天日忽得高

放遊錄

言

阜方畝許有斷碑刻杜審言來此五字並遺礎沒蓬蒿知爲諾詎那宴坐亭暨觀不足亭俱廢據亭址席地仰觀大龍湫凡瀑奔流不離絕壁獨此瀑從山頂石凹飛出空中如舒匹練作態悠揚又如揉萬斛花併冰綃碎委或蜿蜒飄曳久而不下蕩爲雲烟委蛇縹緲或狂風猝攪雪舞玉虬光搖銀海亦或成雨激射亂撲向人俄復引去傾河倒峽震壑轟雷於大龍湫堪歎觀止惜天陰無夕陽閃爍幻出彩虹五色耳

峻阪千盤備險艱，去來兩度馬鞍山。縱教矍鑠能雄據，老驥其如伏櫪閒。

剪刀峯

蟹撐兩螯刺霄漢，雨絲烟縷遇立斷。就裁雲錦爛屏張，旋磨去作柱森天闥。紆迴一帆趁風起，焉得截取吳江水。

出能仁寺觀大龍湫放歌

山奇故多以水勝，水奇莫過平山瀑。流天台匡廬之

瀑已奇極奇，又奇極大龍湫。能仁古寺走相訪，重重

放遊錄

三

嶂列連雲道陰崖，合沓逼無路。阪絕輒轉緣，丹邱羊腸詰屈行迤邐。但聽雷挾風颺颺，泉聲撼耳谷俱震。陡見一瀉千丈脩，傾河倒峽噴冰雹。詭態百出難形求，初如白虹垂，飲潤忽掉舞。壑成玉蚪，又如兜羅綿亂擲，併委萬匹蛟。絹柔有時搏弄雪，纏滾時或蕩作輕烟浮。有時飛激雨衝射，時或捲入空潭收。當年詎那宴坐處，尙遺亭址荒巖幽。苔封蘚積，蝕碑字云是唐賢題名之所留。我來已後千餘秋，人生何必公與侯。奇興浩發不自休，噫嘻吾乃得放游。登臨於此歎

觀止龍湫美盡東南陬

二十三日能仁飯後爲寺僧導引溯筋竹澗菊英潭循石門入化城嶂望常雲峯在雲內遂從頂珠石下出獅巖訪淩雲寺址厯含珠峯峯稜壁聳中裂縫銜圓石如珠逾含珠峯約百步見峯頭有石相對俯仰如兩人對語曰二仙峯從二仙峯入卽梅雨巖巖峭削百餘仞環成壑壑擁崖時瀑自崖巔飛下半壁觸石噴起飄灑四時濛濛如梅雨每遇風娘娜輒縈霧縠烟綃凝眺時許過西石梁洞訪蕉林纖綠無存

放遊錄

美

矣洞口一石橫互梁起丈餘中空構屋三楹爲人棲止外有巖抱如廊巖端一斜穴圓而長名天窗泉不時下如珠錯落並有瀑鳴鏗錚如金鐵察之聲在巖底嗣更穿林越壑行二三里時陟降窮極險巖達梯雲谷谷上接玉臺徑兩大石谿衍駢峙如合掌磴從掌根上如梯通危橋跨飛瀑瀑爲石逼分兩道成燕尾泉流注深澗去此八里可躋是山絕頂縱目湖海以聞雁湖久湮葑草彌漫四塞無寸波尺水並連日陰翳卽觀海亦徒望洋回宿能仁寺

梅雨巖

靈源自天下大致龍湫同惟有巖腰石突出泉觸噴
沫漫晴空四時如雨常溟濛山中日日黃梅節况擁
峯巒並奇絕過眼雲烟時起滅聚成匹練散玉屑

西石梁洞

蕉林綠無存危崖石層叅谿衍洞深闢中有梁亘起
阿誰太古民幽穴託棲止更廻巖作廊其上天窗啟
不知泉何來纍纍似珠委豈仙幻游戲麻姑擲原米
點點的爍跳應勿混蕙苴齊向雪竇傾開鑿斧疑鬼
放遊錄

毛

矧藏瀑暗流餘音繞山趾

梯雲谷

仰接玉臺徑烟雲路欲迷巖通橋宛轉石磴倚如梯
二十四日由能仁寺重過馬鞍嶺路經黃巖洞玉屏
峯因訪靈峯洞晤僧化城知前游觀音洞卽靈峯洞
爲化城大願力募建觀音殿及各臺榭並導游碧霄
峯朝陽洞訪碧霄院址瞻綺閣綺閣乃巖石自生成
如閣嵌壁隨出玉環嶂取道謝公嶺於落屐亭小憩
按謝康樂當日僅過筋竹澗未入谷落屐亭胥後人

附會既從謝公嶺返大荆承張莘儒上舍備舟邀泛石門潭俄大風雨阻不克進次日擬游南北閣仍雨遂於二十五日冒雨行出得錢武肅王鐵券處夜抵蘆橋爲楊定夫侍御留宿公廨二十六日早馳海門惟南北閣竟未得游姑俟異日雪泥鴻爪非人之所逆覩也

泛石門潭爲大風雨阻之明日擬游南北閣仍雨不果遂行

東西谷盡興易闕尙有南閣北閣諸林巒肩輿昨出放遊錄

天

大荆驛返見兩崖夾峙澄潭寬天開石門若雙闕倒映懸巖水衝齧風狂橫去擊怒濤生咫尺扁舟不能越正擬明朝入閣行未堪夜雨達旦雷還鳴山靈尼客有深意留待赤壁後賦成

二十七日至二十九日俱在海門靜候輪船於五月初一日展輪駛甯波府隨附輪來滬寓中和棧小住盤桓當晤友人談及都門外西山之勝爲昔日久欲游而未果者遂附輪駛津門於六月初三日乘火車入都居謝公祠消夏日與同鄉親舊並諸世好過從

甚樂嗣於二十日偕吳劍秋水部錡先出彰義門經
玉泉山昆明湖投臥佛寺門外蒼松夾道一石牌坊
瑩潔如玉鏤人物花草工細如髮無絲缺損北地嚴
凍不知幾千百年物至今完好殆彼教中有護持者
進謁臥佛見金身偃臥伸脚舒臂無我相亦無人相
對之萬緣俱寂晚投碧雲寺宿碧雲寺局勢崇闕凡
厯階八九百級後擁平臺臺列塔五左爲空院有泉
逶迤循東廊出右爲

行宮近未修理二十一日早發碧雲行五里許忽望

放遊錄

堯

樓臺簇起白塔崢嶸爲靈光寺當入瞻眺佛殿外頗
多精舍大都几淨窗明其別院尙有人捐金錢營造
瑤結瓊構亭榭一新旋過秘魔崖留飯僧寮時已卓
午解衣磅礴小坐綠陰談至日西馳戒壇寺距里餘
溪雲空湧山雨欲來當促輿人疾馳剛入寺門傾盆
立注隨止開晴遂游禪院綠窗朱戶紺宇琳宮古木
參天惟蒼髯叟天矯尤異臥龍翔鳳並錫佳名惜活
動松僵未一覩但讀

純廟詩碑同深欽仰二十二日自戒壇度渾河馳潭

栢依路山重嶺復徑轉峯迴門額岫雲中開磴道老
松八九偃仰交加鱗鬣畢張虬柯蟠屈引人入勝不
數十武卽爲寶地珠林鹿苑天成龍潭水注並爲尋
源溯委繞猗竿亭出延清閣適值微雨坐聽泉流瀟
瀟細縈翠竹而下空階塵心淨滌此境殊非人生所
可多得二十三日仍回碧雲寺於二十四日返都門
當擬出都因悉李鑑堂制軍新奉

詔旨敦迫就道爲守其一晤共話時艱兼叙衷曲至
八月中秋前五日始從津沽附輪申江以歸吾里是

放遊錄

罕

行放游南北散懷山水蕭然忘羈王子猷已先我言
矣

伏日與吳劍秋水部游西山從臥佛寺投碧雲寺
宿用杜游龍門奉先寺韻

驟離熱惱場同涉清涼境槐高咽蟬聲松老幻龍影
露臺塔俱崇風壑泉自冷爲謁臥佛來安禪夜忘省
早起由碧雲過靈光寺遂飯秘魔崖小坐出馳戒
壇寺雨復晴卽事

碧雲深處鐘鳴起山欲窮探更西指樹頭初日猶未

升貪趁早涼行逸邈迤邐行從千仞岡遙辨白塔知
靈光樓臺一簇半新構疑有金闕兼瑤房匆匆又向
前溪度旋望精藍隱烟樹就中禪室倍清幽秘魔崖
倚諸天護到此僧徒留客餐雜然野菘羅盈盤蘭膳
筍脯卽珍膳底訝菜圃羊踏殘芬餘香積槐陰午濃
綠森沈不知暑科頭箕踞坐移時言往戒壇萬壽宇
戒壇一名萬壽寺 電掣颺馳起霧昏急裝剛卸雨傾盆須臾
亂點跳珠止疊嶂晴開抹翠痕梵宮首晉隋唐世踵
宋金元明繼替我

放遊錄

望

朝賜額爲重修宏拓規模增壯麗寺多古木松最奇
蜷柯詰屈形支離臥龍翔鳳各殊態獨惜存無活動
枝鴻篇碑紀昭

宸翰佛閣齊雲並巍煥西湖靈隱易地同還參五百

阿羅漢

五百羅漢像同靈
隱寺疑出一手

夜宿潭柘岫雲寺與吳劍秋延清閣聽泉

崢嶸岫雲寺乃在潭柘麓我同出戒壇西度渾河曲

山路旣崎嶇沙石還犖嶱招提迅將近鱗鱗露垣屋


磴道松屈蟠圍蔭低護綠若爲行人遮虬枝故伸縮

入門氣氤氳烟裊旃檀馥靈境做華嚴梵宇輝丹雘
誰云四大空中有三界託且從猗竿亭隨過延清閣
有泉繞階流琤瑯漱鳴玉况帶雨欲秋涓涓細縈竹
夜闌萬籟寂洗耳涼意足聊共滌煩襟遐想寄濠濮
游西山返將出都留別同志諸子

都門來莫謂無名游補西山壯此行雁宕曾經留後
至龍泉終聽遂平生精金每被人言鑠貝錦翻資黨
織成天濶雲浮揮手去觚稜惟有夢魂縈

跋

右錄從長沙解纜起至出都止記未盡作為詩歌詠
之都門消夏得讀徐霞客游記遂做其體顧霞客有
記鄙人益之以詩其視霞客較詳雖然霞客好游士
凡好游者人知之亦囂囂人不知亦囂囂惟取山水
自適其志已耳曷嘗有長言之不足而又詠歎之意
感於中耶光緒二十五年己亥冬十月希復自跋



放遊錄

跋

望



0791